

**S L A M**

Stopp!

Jetzt isch aber mol guet  
Do lupfts mer de Huet

Aber jetzt mol ernsthaft  
Im Ernst  
Ehrlich  
Bis doch mol ehrlich  
Bis doch mol ehrlich zu dir selber und hinterfrog di

Mach mol en Schritt zrugg und stoh hinter dir  
Lauf mol um di ume  
Lueg di a  
Lueg di mol vo vorne a  
Lueg der selber id Auge und frog Di:  
„Hesch es eigentlich au scho mal mit Liebi probiert?“

Oder isch DAS öppe din Ernst?  
Isch doch alles nur Theater,alles gspielt  
Es isch nöd echt, alles nume gestellt

Junge, mol im Ernst: sones liebloses Ine-Use-Dir nix-Mir viel-hoppla fertig-Gerammel... das bringt au en Zwergchüngel no ane.

Und Du, liebs Mädle: Ich weiss, ich weiss... Akzeptiert zwerde isch für dich grad u huere wichtig.

Das isch au guet so, aber die Akzeptanz wome mit sonere  
ine-use-mir nix-dir viel-hoppla fertig-spray druff-Gschicht erntet,  
isch nünt als es verloges Spiel.

Und ehrlich:

Chasch di mit dem zfride geh?  
Isch doch alles nur Theater, alles gspielt

Es isch nöd echt, alles nume gstellt

Und drum mach mol en Schritt uf d Siite, nimm Di a de Hand  
und zeig Dir selber wie me NEI seit.

Und das me das au dörf.

Ihr dörfed das, nei müend... will Sex ebe KEIS steril verpackts Produkt isch.  
Will me die Sicherheit und de Schutz bruucht

Und drum, Fraue und Männer:  
Schützed eu i dere Welt  
Schützed eu vor Tripper, Infekt, und vor Sex sells  
Denn was sich liebt, das schützt sich!  
Drum schütz dich vor: Gonorrhö, Machos und Aids.  
Schütz Dich vor Dummheit i dim Bett, und vor Jungs wo säged sie wölled keis Kondom, will's  
denn „nüt me gspüred“.

Als ob die jemals glernt hettet z gspüre, z fühle und MIT ihrne Gefühl Sex z'ha.

Debi chasch Sex mit Liebi endlich lebe und zelebriere  
Anstatt en einfach nume z konsumiere

Denn ischs au nüme Theater, nüme gspielt  
Alles echt und ernsthaft, da ischs was zellt

Denn dörfsch Dich vollkomme gheie lo  
Und zfride sii, wenn am Morge dennoh...  
öpper nebet Dir liit.  
Es Lächle chunt dir entgege und Du erinnerisch dich anes wunderbars  
liebi geh - liebi neh – nöchi teile – zeme sii – gheie lo und abhebe- Fүүrwerk

Kurzfassung Herbst 2010

© 2010 Kyrién Geisser, Matthias Nüesch